

Ya'a tse'e je mumejtsk nak juu' ve'e je Pablo tyuknuja'yi je jaanchja'vivatajk jep Tesalónica

1 Atse'e je Pablo, maat je Silas jets je Timoteo, máyam aatse'e je Dios ntuknukexta je jaanchja'vivatajk juu' ve'e nay'amojkijidup jem tesalónicait kyajpun kajxm. Je Nte'yam, juu' ve'e nTeel'imdud, jets je Maja Vintsán Jesucristo, jeme'e je'e jya'vin kajxmda m'litta. ²Je Dios Tee' jets je Maja Vintsán Jesucristo, je'e tse'e mkunoo'kxjadap jetse'e m'ijttinit je y'oy joot maatta.

**Je Nte'yame'e dutokimpayo'ynup
anañujoma ku ve'e
je Cristo myiinnuvat**

³Utsta ajchta utsta tsa'ada, pyaatyp y'akeeguip xa je'e ve'e jets aatse'e xa'ma nkukojsjat je Nte'yam miits kajxta kux nuyojke'e xjaanchjávada je Jesucristo jets nuyojke'e mnachókjada to'k jado'k vintso ve'e ya it ñaxy. ⁴Je'e kajxts ats miitse'e nyakmájada joma ve'e je Nte'yam je jyayu ñay'amókajada, kux óyame'e je jayu mjomtónjada mtitónjada, mak k aaj mak joot tse'e xjaanchjávada je Maja Vintsán jetse'e xmuténada je tsaachpaatun

juu' ve'e myaknajxtup. ⁵Ax ya'a tse'e duyaknuke'xnatajkip jets tokimpayo'type'e je Nte'yam ax jo'n dupaa'ty du'akeega, je'e kajx tse'e je Nte'yam du'oyjava jetse'e m'ittat jem je'e y'am kya'm juu' kajxe'e je jayu uxyam myaktsaachpaa'tjada.

⁶Pyaatpap y'akeeguivap xa je'e ve'e juu' ve'e je Nte'yam tyuump, je'e tse'e dutonumpijtjap je tsaachpaatun je'eda pan pan jatye'e uxyam myaktsaachpaatjudup.

⁷Oyame'e uxyam mtsaachpaa'tta, myakjot'amájajadapts miitse'e je Nte'yam, ve'empats aatse'e xyakjot'amájivat, van'it ku ve'e je Maja Vintsán Jesús ñaajknuke'xnatajkijinit ku ve'e jem tsapjootm choo'nut, jem tse'e jan'ayee'nst jootm kyadaaknit maat je myakk angelestajkta.

⁸Je'e ve'e ñumínup jetse'e dutukkuvejtnit je'e pan pan jatye'e je Nte'yam duká'ixada jetse'e dukakuvakta je oy kats je oy ayook.

⁹Tsaachpaattinupts je'e ve'eda, xa'ma kajx tse'e vyintókidinit, ka'a ve'e y'ittat je Maja Vintsán maat, jem joma ve'e je majin je jaanchin

ooj dutunjayep. ¹⁰Ve'eme'e jyáttat je xaaj ku ve'e je Maja Vintsán myiinnuvat, ku ve'e yakmájijidinit yakjaanchijidinit je jyayu jetse'e tyuk'atúvajat pan pan jatye'e jaanchja'vijidup. Jémpats miitse'e mve'nidinit je'e kajx ku ve'e xjaanchjávada je oy kats je oy ayook, juu' aats miitse'e nvaajnjudu.

¹¹Ax je'e kajxts aats miitse'e ijtp nmutsapkotsta, ve'em tse'e je nNte'yamamda du'oyjávát jetse'e m'ijttinit je'e je jyayu. N'amótup aatse'e jetse'e je myakkin kajx xtóndat nujom je y'oy je'e juu' ve'e mtsojktup jets je y'oy je'e juu' ve'e mtoondup kuxe'e je Jesucristo xjaanchjávada. ¹²Nutsapkojstupts aats miitse'e jetse'e yakmaja yakjaancha y'ijtnit je nMaja Vintsánamda Jesucristo miits kajxta, nay ve'empa miits je'e ve'e myakmájijidinit. Je nNte'yamamda jets je Maja Vintsán Jesucristo je myaa'yun kajxts ya'a ve'e nujom tyónjut.

Je katsukutee'mpa

2 Utsta ajchta utsta tsá'ada, ax je'e pan vin'ite'e myiinnuvat je nMaja Vintsánamda Jesucristo, ku ve'e xyaknay'amojkimjidinit je'e maat, nmunoo'kxtktup tse'e jets ²ka'a ve'e je mvinma'yun xyaktiktskojttat, ka'a tse'e mnavyinma'yunmo'ojadat ku ve'e xmótudat jets távani ve'e je Maja Vintsán jye'ya. Ka'a tse'e xjaanchjávadat pan ve'eme'e yakkats, pan vaandupe'e je jayu jets je Espíritu Santo kajxe'e ve'em kyotsta, ni ka'a tse'e xjaanchja'viduvat pan vaandupe'e

jets jep aats je'e ve'e nak kujxp nmuja'yidi. ³Ka'a tse'e pan mvin'aa'njadat. Too'vajkp xa ve'e je Nte'yam ooj tyunyaktso'oxpákut jetse'e ñuke'xnatákat jets pan je'e ve'e je katsukutee'mpa, je'e juu' ve'e nupaamdukani ijtp jetse'e vyintókiyut. Távani tse'e ñuke'xnatáka vye'na, van'ítnum tse'e myiinnuvat je nMaja Vintsánamda Jesucristo. ⁴Ax je katsukutee'mpa tse'e dutso'oxpákup nujom juu' ve'e je Nte'yam jye'e jets juu' jatye'e yakvinja'vip yakvintsá'kip, je'e paat tse'e dutónut jetse'e y'ajxtukut jep je Nte'yam myaja tsaptujkp. Viinm tse'e ñatyijjut Nte'yam.

⁵¿Ka'a ve'e xjaa'myétsta jets nvaajnjudu ats miits ya'a ve'e ku atse'e nve'na miits maatta? ⁶Ax mnuja'vidup tse'e juu' je'e ve'e uxyam yak'ataajnjup. Ku ve'e yakpajkjat juu' ve'e yak'ataajnjup, van'it tse'e nuke'xnatáka tyánut jets je'e je'e ve'e je katsukutee'mpa. ⁷Kux ku xa ve'e je Nte'yam ooj tyunyaktso'oxpákut, ton'ukvaajnjup tse'e. Ax ka'anum tse'e y'oya jetse'e jye'yat je katsukutee'mpa, van'ítnume'e ku ve'e yakpajkjat juu' ve'e yak'ataajnjup. ⁸Távani tse'e yakpujka vye'na, van'it tse'e ñuke'xnatákat je katsukutee'mpa. Yakvintókijupts je'e ve'e je Maja Vintsán Jesús maat je pyiixtuk ku ve'e myiinnit je y'ajajtk je y'ata'kxtk maat. ⁹Je Satanás xa ve'e duyakjéjap je katsukutee'mpa jetse'e dumó'ot je kyutojkun. Je katsukutee'mpa tse'e je jayu dvin'aa'ndap ku ve'e dutún je mújit nuja'vin jets juu' jatye'e

mújit atuva juu' ve'e je Nte'yam kyaje'eip; ¹⁰je tun je kats juu' ve'e ka óyap, je'e tse'e tyukvin'aa'ndap je'e pan pan jatye'e vintókidinup. Ve'eme'e jyjattinit kux ka'a ve'e dukuvajkti je tyuv je'e juu' kajxe'e kuchookti. ¹¹Kuxe'e dukakuvakta je tyuv je'e, je Nte'yam tse'e pámjadap vintso ve'e yakvin'aa'ndat, ve'em tse'e dujaanchjávadat jets je Nte'yam kajx je'e ve'e myin je katsukute'e'mpa. ¹²Ax ve'em tse'e yakmooydinit je tsaachpaatun juu' ve'e xa'ma kajx ijtp nujom pan pan jatye'e dukajaanchjavavaandup je tyuv je'e, je'eda juu' ve'e naajk'ituvaajnjudup jep tokin jaatp.

**Pan pan jatye'e vinkanda jetse'e
dujayeiptinit je joojntykin
juu' ve'e xa'ma kajx ijtp**

¹³Utsta ajchta utsta tsa'ada, ka'a xa miitse'e ve'em mjáttat, mtuntsojkdjudup xa miitse'e je Maja Vintsán. Pyaatyp y'akeeguipts je'e ve'e jets aats je'e ve'e xa'ma nkukojsjat miits kajxta. Ka'anume'e ya it choo'nduk vye'na jetse'e je Nte'yam mvinkoojnjidi jetse'e tsa'ak m'ijttinit kuxe'e je Espíritu Santo mpaajmjidi je Nte'yam maat jets je'e kajx ku ve'e xjaanchjávada je tyuv je'e. ¹⁴Myaaxuxjudu xa ve'e je Nte'yam jetse'e myaktsookjidi je oy kats je oy ayook kajx juu' aats miitse'e nvaajnjudu, ve'em tse'e je nMaja Vintsánamda Jesucristo xtukmaatjayeiptinit je myajin.

¹⁵Ax ve'em tse'e, utsta ajchta utsta tsa'ada, naajk'ítjada mákk aaj mákk joot jets ka'a tse'e xmaso'oktat je ixpajkun

juu' aats miitse'e ntuknuja'vidu, pan nvaajnjuduts aats miits je'e ve'e uk pan atsts miitse'e ntuknuja'vidu. ¹⁶NTEE'imdup xa ve'e je Nte'yam jets ooy tse'e xtuntsojkmuda, je'e je myaa'yun kajx tse'e xyakjot'amájimda xa'ma kajx jetse'e xtuknuja'vimda jets oy je'e ve'e juu' ve'e xtoojnjimdup ku ve'e je Jesucristo myiinnuvat. ¹⁷Je Nte'yam jets je nMaja Vintsánamda Jesucristo, je'e tse'e myakjot'amájajadap jetse'e myakmakpákjadat, ve'em tse'e xtóndat xkótstat juu' ve'e tum oy.

“Nutsapkotsta aats to'k aaj”

3 Uxyam tse'e, utsta ajchta utsta tsa'ada, nutsapkotsta aats to'k aaj jetse'e ve'em anañujoma je jayu dunujávadat je Maja Vintsán je kyats je y'ayook jetse'e oy yakxón yakkuvákut, ve'em ax jo'n tyoojnji kyojtsji miits maatta. ²Tsapkojststuva jets aatse'e je jayu xkah'amaadaagadat juu' ve'e je kyo'oy je'e dumuyo'ydup jetse'e oyvintsova juu' dutonda dukotsta, kux ka'a xa ve'e anañujoma dujaanchjávada je Maja Vintsán. ³Ax je Maja Vintsán, kyutyuumpts je'e ve'e juu' ve'e kyajtsp, je'e tse'e je mákk aaj je mákk joot mmo'ojadap jetse'e m'íxjadat mjayépjadat, ve'em tse'e mkapaa'tjadat je kyo'oy je'e. ⁴Ax je Maja Vintsán kajxts aatse'e vinjava ntañ jets mtóndape'e juu' ve'e ntukpavaandup, ve'em uxyam, jets ve'em vintso ve'e ya it ñaxy. ⁵Je Maja Vintsán tse'e dupámup jem mja'vin kajxmnda je Nte'yam je chojkun, jets je Cristo je myakkin kajx tse'e xjayeiptinit je mákk aaj je mákk joot.

Vinkopke'e jēse'e jē jayu tyónūt

⁶Utsta ajchta utsta tsa'ada, ntukpavaandup xa aats miitse'e jē nMaja Vintsánamda Jesucristo kajx jēse'e xka'íttat jē uts jē ajch ukpu jē uts jē tsa'a maat juu' ve'e nooxtsuunip jēse'e dukakutyún jē ixpajkún juu' aats miitse'e nvaajnjidu. ⁷Mnuja'vidup xa miitse'e vintso ve'e dutsak jēse'e xnu'ixva'atstat juu' aatse'e ntoon nkojts, ka'a aatse'e nnooxtsuuni ku aatse'e n'ijt miits maatta, ⁸ka'a aatse'e ve'emji nkaajy n'uuk, toonupajk aatse'e jóvum xaaj jóvum tsooj, ve'emts aatse'e ni pana miitsta nka'h'atsuux. ⁹Oyam aats je'e ve'e xjatukkadaaky jets aats miitse'e kuxputajkidi, ka'ats aatse'e ti n'amotu, ve'em tse'e xnu'ixva'atstat vintso aatse'e juu' ntun. ¹⁰Kux ku xa aatse'e nve'na miits maatta, jidu'um tse'e ntukpavaandi: Pan pan xa ve'e katonuvaamp, ka'a tse'e kyáyut. ¹¹Ta xa aatse'e jē kats nmotu jets jem miitse'eda juu' ve'e nooxtsuunidup, je'e ve'e tyuktajkidup juu' ve'e kyatoonkidup, ni tía tse'e dukatonda. ¹²Ax je'ets aats je'e ve'e ntukpavaandup jets aatse'e

nkojtsjada jē nMaja Vintsánamda Jesucristo kajx, jets to'k aaj to'k joot'e dunutóndat juu' ve'e tyukjoojntykadap.

¹³Utsta ajchta, utsta tsa'ada, ka'a tse'e mnoo'kxtat, ijtp'e xtóndat xkótstat jē y'oy je'e.

¹⁴Pan jem xa ve'e pan pan jatye'e dukamajapaamdup juu' atse'e nkajtsp yam nak kajxm, íxtats pan pan je'e ve'eda, ka'a tse'e je'e maat m'uknapyaajmjidinit, ve'em tse'e cho'otyóndat. ¹⁵Ax ka'a tse'e xtso'oxpáktat, ve'eme'e xkojtsjadat juu' ax jo'n to'k uts to'k ajch ukpu ax jo'n to'k uts to'k tsa'a.

Ku jē Pablo kyojtskukajxini

¹⁶Je Maja Vintsán, juu' ve'e jē oy joot duyajkp, je'e tse'e viinm ijtp mmo'ojadap jē y'oy joot pan ti ve'e toojnup kojtsjup. Je Maja Vintsán tse'e ijtnup miits maatta anañujoma.

¹⁷Ats, jē Pablo, viinm atse'e nja'a ya máyam jē Dios juu' ats miitse'e ntuknukejxtup. Jidu'um tse'e jē jayu dunujávada to'k ka'ajyji jē nak juu' jaty atse'e nkejxp ku ve'e du'ixta jē letra juu' atse'e njaayp, jidu'um atse'e nja'a. ¹⁸Je nMaja Vintsánamda Jesucristots miitse'e anañujoma mkunoo'kxjadap.